

筠

齋

漫

錄

筠齋湯錄卷之三

錫山黃學海宗子甫輯

國語

晉羊舌肸聘于周蒺藜幣於大夫及單靖公靖公享之儉而敬賓禮贈餞視其上而從之燕無私送不過郊語說昊天有成命單之老送焯向焯向告之曰異哉吾聞之曰一姓不再興今周其興乎其有單子也昔史佚有言曰動莫若敬居莫若儉德莫若讓事莫若容單子之况我禮也皆有焉夫宮室

不崇器無彫鏤儉也身聳除潔外內齊給敬也宴
好享賜不踰其上讓也賓之禮事放上而動容也
如是而加之以無私重之以不殺能辟怨矣居儉
動敬德讓事容而能辟怨以為卿佐其有不興乎
桓公自莒反於齊使鮑斟為宰蒞曰臣君之庸臣
也君加隱於臣使不凍餒則是君之賜也若必治
國家者則非臣之所能也若必治國家者則管夷
吾乎臣之所不若夷吾者五寬惠柔民弗若也治
國家不失其柄弗若也忠信可結於百姓弗若也

制禮義可法於四方弗若也執桴鼓立於軍門使
百姓加勇焉弗若也桓公使請諸魯如鮑叔之言
嚴公以問施伯施伯對曰此非欲戮之也欲用其
政也夫管子天下之才也所在之國則必得志於
天下令彼在齊則必長為魯國憂矣將殺管仲齊
使者請曰寡君欲親以為戮若生得以戮於羣
臣猶未得請也請生之於是嚴公使束縛以予齊
使齊使受而以退比至三黜三浴之桓公親送之
于郊而與之坐問焉曰昔吾先君襄公築臺以為

高位田狩畢弋不聽國政卑聖侮士而唯女是崇
九妃六嬪陳妾數百食必梁肉衣必文繡戎士凍
餒戎車待游車之裂戎士待陳妾之餘優咲在前
賢材在後是以國家不日引不月長怨宗廟之不
掃除社稷之不血食敢問為此若何

管子對曰昔者聖王之治天下也參其國而伍其
鄙定民之居成民之事而慎用其六柄焉桓公曰
成民之事若何管子對曰四民者勿使雜處雜處
則其言隳其事易公曰處士農工商若何管子對

曰昔聖王之處士也使就閒燕處工就官府處商就市井處農就田野令夫士群萃而州處閒燕則父與父言義子與子言孝其事君者言教其幼者言悌少而習焉其心安焉不見異物而遷焉是故其父兄之教不肅而成其子弟之學不勞而能夫是故士之子恒為士令夫工羣萃而州處審其四時辨其功苦權節其用論比協材以旦莫從事施於四方以飭其子弟相語以事相示以巧相陳以功少而習焉其心安焉不見異物而遷焉是故其

父兄之教不肅而成其子弟之學不勞而能夫是
故工之子恒為工令夫商群萃而州處察其四時
而監其鄉之資以知其市之賈負任儋何服牛輶
馬以周四方以其所有易其所無市賤鬻貴旦莫
從事於此以飭其子弟相語以利相示以賴相陳
以知賈少而習焉其心安焉不見異物而遷焉是
故其父兄之教不肅而成其子弟之學不勞而能
夫是故商之子恒為商令夫農群萃而州處察其
四時權節其用耒耜枷耨及寒擊募除田以待時

耕及耕深耕而疾耨之以待時雨時雨既至挾其
槍刈耨鋤以旦莫從事於田野脫衣就功首戴茅
蒲身衣襪襍霑體塗足暴其髮膚盡其四支之敏
以後事於田野少而習焉其心安焉不見異物而
遷焉是故其父兄之教不肅而成其子弟之學不
勞而能夫是故農之子恒為農桓公曰定民之居
若何管子對曰制鄙三十家為邑邑有司十邑為
宰宰有年帥十年為鄉鄉有鄉帥三鄉為縣縣有
縣帥十縣為屬屬有大夫五屬故立五大夫各使

治一屬焉立五政各使聽一屬焉是故政之政聽
屬牧政聽縣下政聽鄉屬有居處爲義好學慈孝
於父母聰慧質仁發聞於鄉里者有則以告有而
不以告謂之蔽明其罪五屬有拳勇股肱之力秀
出於衆者有則以告有而不以告謂之蔽賢其罪
五屬有不慈孝於父母不長弟於鄉里驕躁淫暴
不用上令者有則以告有而不以告謂之下比其
罪五五屬大夫於是退而修屬屬退而修縣縣退
而修鄉鄉退而修卒卒退而修邑邑退而修家是

故匹夫有善可得而舉也匹夫有未善可得而誅也政既成以守則固以征則彊

桓公曰吾欲從事於諸侯其可乎管子對曰未可國未安桓公曰安國若何管子對曰修舊法擇其善者而業用之遂滋民與無財而敬百姓則國安矣桓公曰諾遂修舊法擇其善者而業用之遂滋民與無財而敬百姓國既安矣桓公曰國安矣其可乎管子對曰未可君若正卒伍修甲兵則大國亦將正卒伍修甲兵君有攻伐之器小國諸侯有

守禦之備則難以速得志矣君若欲速得志於天下諸侯則事可以隱令可以寄政桓公曰為之若何管子對曰作內政而寄軍令焉桓公曰善管子於是制國五家為軌軌為之長十軌為里里有司四里為連連為之長十連為鄉鄉有良人易以為軍令五家為軌故五人為伍軌長帥之十軌為里故五十人為小戎里有司帥之四里為連故二百人為卒連長帥之十連為鄉故二千人為旅鄉良人帥之五鄉一帥故萬人為一軍五鄉之帥帥之

三軍故有中軍之鼓有國子之鼓有高子之鼓春
以獫狁旅秋以獮治兵是故卒伍整於里軍整於
郊內教既成令勿使遷徙伍之人祭祀同福死喪
同恤禍災共之人與人相疇家與家相疇世同居
少同游故夜戰聲相聞足以不乖晝戰目相視足
以相識其歡欣足以相死是故守則同固戰則同
彊君有此士也三萬人以方行於天下以誅無道
以屏周室天下大國之君莫之能禦也

桓公曰吾欲從事於諸侯其可乎管子對曰未可

鄰國未吾親也。君若欲從事於諸侯，則親鄰國。桓公曰：「若何？」管子對曰：「審吾疆場而反其侵地，正其封疆，無受其資以安四鄰，則四鄰之國親我矣。爲游士八十人，奉之以車馬衣裘，多其資幣，使周游於四方，以號召天下之賢士，皮幣玩好，使人鬻之。四方以監其上下之所好，擇其滯亂者而先征之。」桓公問曰：「夫軍令則寄諸內政矣，齊國寡甲兵，爲之若何？」管子對曰：「輕過而移諸甲兵。」桓公曰：「爲之若何？」管子對曰：「制重罪贖以犀甲一戟，輕罪贖以」

韞盾一戟小罪謫以金分宥閒罪索訟者三禁而不可上下坐成以束矢義金以鑄劒戟試諸狗馬悉金以鑄鉏夷斤櫛試之壤土甲兵大足桓公曰吾欲南伐何主管子對曰以魯為主反其侵地堂潛桓公曰吾欲西伐何主管子對曰以衛為主反其侵地臺原姑與漆里桓公曰吾欲北伐何主管子對曰以燕為主反其侵地柴夫吠狗四鄰大親既反侵地正封疆地南至于陶陰西至于濟北至于河東至於紀鄆有車車八百乘擇天下之甚淫

亂者而先征之即位數年東南多有滯亂者萊莒
徐夷吳越一戰帥服三十一國遂南征伐楚濟汝
踰方城望汶山使貢絲于周而反荊州諸侯莫不
來服遂北伐山戎剌令支斬孤竹而南歸海濱諸
侯莫不來服與諸侯飾牲為載以約誓于上下庶
神與諸侯戮力同心西征攘白翟之地至於西河
方舟設泚乘桴濟河至於石抗縣車來馬踰大行
與辟耳之谿拘夏西服汭沙西吳南城周反胙于
絳嶽濱諸侯莫不來服而大朝諸侯於陽穀兵車

之屬六乘車之會三諸侯甲不解纍兵不解翳殺
無弓服無矢隱武事行文道帥諸侯而朝天子諸
侯稱順焉桓公憂天下諸侯魯有夫人慶父之亂
二君殺死國絕無嗣桓公聞之使高子存之翟人
攻邢桓公築夷儀以封之男女不淫牛馬選具翟
人攻衛衛人出廬於曹桓公城楚丘以封之其畜
散而無育桓公與之繫馬三百天下諸侯稱仁焉
於是天下諸侯知桓公之為已動也是故諸侯歸
之譬若市人桓公知諸侯之歸已也故使輕其幣

而重其禮故天下諸侯罷馬以為幣縷纂以為奉
鹿皮四个諸侯之使垂橐而入捆載而歸故拘之
以利結之以信示之以武故天下小國諸侯既許
桓公莫之敢背就其利而信其仁畏其武桓公知
天下諸侯多與已也故又大施忠焉可為動者為
之動可為謀者為之謀軍譚遂而不有也諸侯稱
道焉通齊國之魚鹽于東萊使關市幾而不征以
為諸侯利諸侯稱廣焉築葵茲晏負夏領釜丘以
禦戎翟之地所以禁暴於諸侯也築五鹿中年蓋

與牡丘以衛諸夏之地所以示權於中國也教大成定三革隱五刃朝服以濟河而無怵惕焉文事勝矣是故大國慙愧小國協附唯能用管夷吾審戚隰朋賓胥無鮑牙之屬而伯功立

齊桓之伯也任一仲父而審戚隰朋鮑牙之屬皆見用晉文之徧厯諸國實藉三賢其歸而治晉也以舊姓十一族寔掌近官諸姬之良掌其中官異姓之能掌其遠官悼公之復伯也亦唯知人而用之各當其才使張老延君譽於四

方且觀道達者公譽達於戎于是乎始復伯政
在得人安危在所任信哉

越王勾踐召五大夫問戰王乃入命夫人王背屏
而立夫人向屏王曰自今日以後內政無出外政
無入內有辱是子也外有辱是我也吾見子於此
止矣王遂出夫人送王不出屏乃闔左闔填之以
土去筭側席而坐不婦王背檐而立大夫向檐王
命大夫曰食土不均地之不修內有辱於國是子
也軍士不死外有辱是我也自今日以後內政無

出外政無入吾見子於此止矣王遂出大夫遂王
不出檐乃闔左闔填之以土側席而坐不埽王乃
之壇列鼓而行之至於軍斬有罪者以狗曰莫若
此以環瑱通相問也明日徙舍斬有罪者以狗曰
莫如此不從其伍之令明日徙舍斬有罪者以狗
曰莫如此不用王命明日徙舍至於禦見斬有罪
者以狗曰莫如此滛逸不可禁也王乃命有司大
狗於軍曰有父母耆老而無昆弟者以告王親命
之曰我有大事子有父母耆老而子為我死子之

父母將轉於溝壑子為我禮已重矣子歸沒而父母之世後若有事吾與子圖明日狗於軍曰有兄弟四五人皆在此者以告王親命之曰我有大事子有昆弟四五人皆在此事若不捷則是盡也擇子之所欲歸者一人明日狗於軍曰有眩瞽之疾者王親命之曰我有大事子有眩瞽之疾其歸若已後若有事吾與子圖之明日狗於軍曰筋力不足以勝甲兵志行不足以聽命者歸莫告明日遷軍接蘇軾有罪者以狗曰莫如此志行不果於是

人有致死之心王乃命有司大徇於軍曰謂二三子歸而不歸處而不處進而不進退而不退左而不左右而不右身斬妻子鬻於是吳王起師軍於江北越王軍於江南越王乃中分其師以為左右軍以其私卒君子六千人為中軍明日將舟戰於江及昏乃令左軍銜枚泝江五里以須亦令右軍銜枚踰江五里以須夜中乃令左軍右軍涉江鳴鼓中水以須吳師聞之大駭曰越人分為二師將以夾攻我師乃不待旦中分其師將以禦越越

王乃令其中軍銜枚潛涉不鼓不譟以襲攻之吳師大北越之左軍右軍乃遂涉而從之又大敗之於浚又郊敗之三戰三北乃至於吳越師遂入吳國圍王宮吳王懼使人行成曰昔不穀先委制於越君君告孤請成男女服從孤無柰越之先君何許君成以至于今今孤不道得罪於君王君王以親辱於孤之弊邑孤敢請成男女服為臣御越王曰昔天以越賜吳而吳不受今天以吳賜越孤敢不聽天之命而聽君之令乎寡人其達王於甬句

東夫婦三百唯王所安以沒王年夫差諱曰天既
降禍於吳國不在前後當孤之身土地人民越既
有之矣孤何以視於天下夫差將死使人說於子
胥曰使死者無知則已矣若其有知吾何面目以
見負也遂自殺越滅吳上征上國宋鄭魯衛陳蔡
執玉之君皆入朝夫唯能下其羣臣以集其謀故
也

越王句踐棲於會稽之上乃號令於三軍曰凡我
父兄昆弟及國子姓有能助寡人謀而退吳者吾

與之共知越國之政大夫種進對曰臣聞之賈人
夏則資皮冬則資絺旱則資舟水則資車以待乏
也夫雖無四方之憂然謀臣與爪牙之士不可不
養而擇也辭如簞笠時雨既至必求之今君王既
棲于會稽之上然後乃求謀臣無乃後乎句踐曰
苟得聞子大夫之言何後之有執其手而與之謀
遂使之行成於吳曰寡君勾踐乏無所使使其下
臣種不敢徹聲聞於天王私於下執事曰寡君之
師後不足以辱君矣願以金玉子女賂君之辱請

勾踐女女於王大夫女女於大夫士女女於士越國之寶器畢從寡君帥越國之衆以從君之師使唯君左右之若以越國之罪為不可赦也將焚宗廟係妻孥沉金玉於江有帶甲五千人將以致死乃必有偶是以帶甲萬人以事君也無乃即傷君王之所愛乎與其殺是人也寧其得此國也其孰利乎夫差將欲聽與之成子胥諫曰不可夫吳之與越也仇讐敵戰之國也三江還之民無所移有吳則無越有越則無吳將不可改於是矣負聞之

陸人居陸水人居水夫上黨之國我攻而勝之吾
不能居其地不能乘其車夫越國吾攻而勝之吾
能居其地吾能乘其舟此利也不可失也已君必
滅之失此利也雖悔之亦無及已越人飾美女八
人納之太宰嚭曰子苟赦越國之罪又有美於此
者將進之太宰嚭諫曰嚭聞古之伐國者服之而
已今已服矣又何求焉夫差與之成而去之勾踐
說於國人曰寡人不知其力之不足也而又與大
國執讐以暴露百姓之骨於中原此則寡人之罪

也寡人請更於是葬死者問傷者養生者吊有憂
賀有喜送往者迎來者去民之所惡補民之不足
然後卑事夫差宦士三百人於吳其身親為夫差
前馬句踐之地南至于句無北至于禦兒東至于
鄞西至于姑蔑廣運百里乃致其父兄昆弟而誓
之曰寡人聞古之賢君四方之民歸之若水之歸
下也今寡人不能將帥二三子夫婦以蕃命壯者
無取老婦令老者無取壯妻女子十七不嫁其父
母有罪丈夫二十不娶其父母有罪將免者以告

公令醫守之生丈夫二壺酒一犬生女子二壺酒
一豚生三人公與之母生二人公與之餽當室者
死三年釋其政支子死三月釋其政必歟泣堊埋
之如其子令孤子寡婦疾疹貧病者納宦其子其
達士潔其居美其服飽其食而摩厲之於義四方
之士來者必廟禮之句踐載緇與脂於舟以行國
之孺子之游者無不舖也無不歡也必問其名非
其人之所種則不食非其夫人之所織則不衣十
年不收於國民居有三年之食國之父兄請曰昔

者夫差恥吾君於諸侯之國今越國亦節矣請報之句踐諱曰昔者之戰也非二三子之罪也寡人之罪也如寡人者安與知耻請姑無庸戰父兄又請曰越四封之內親吾君也猶父母也子而思報父母之仇臣而思報君之讐其有敢不盡力者乎請復戰句踐既許之乃致其衆而誓之曰寡人聞古之賢君不患其衆之不足也而患其志行之少耻也今夫差衣水犀之甲者億有三千不患其志行之少耻也而患其衆之不足也今寡人將助天

滅之吾不欲匹夫之勇也欲其旅進旅退也進則
思賞退則思刑如此則有常賞進不用命退則無
耻如此則有常刑果行國人皆勸父勉其子兄勉
其弟婦勉其夫曰孰是君也而可無死乎是故敗
吳於囿又敗之於浹又郊敗之夫差行成

戰國策短長語

秦攻邯鄲十七月不下莊謂王稽曰君何不賜軍
吏乎王稽曰吾與王也不用人言莊曰不然父之
於子也今有必行者必不行者曰去貴妻賣愛妻

此令必行者也曰曰母敢思也此令必不行者也
守問姬曰某夕某孺子內某士貴妻已去愛妾已
賣而心不有欲教之者人心固有今君雖幸於王
不過父子之親軍吏雖賤不早於守問姬且君擅
主輕下之日久矣聞三人成席十夫操椎衆口所
移毋翼而飛故曰不如賜軍吏而禮之王稽不聽
軍吏窮果惡王稽杜摯以反秦王大怒而欲兼誅
范雎雎曰臣東鄙之賤人也開罪於魏逃遁來奔
臣無諸侯之援親習之故王舉臣於羈旅之中天

下皆聞臣之身與王之舉也今愚或與罪人同心而王明誅之是王過舉顯於天下而為諸侯所議也臣願請藥賜死而恩以相葬臣王必不失臣之罪而無過舉之名王曰有之遂弗殺而善遇之范雎前論三貴曰恒思有悍少年請與叢博曰吾勝叢叢籍我神三日叢往求之遂弗歸五日而叢枯七日而叢已今國者王之叢勢者王之神藉人以此得無危乎

莖襄王為太子之時質於齊懷王薨太子歸於齊

王而歸齊王隘之予我東地五百里乃歸子子不
予我不得歸太子曰臣有傳請退而問傳傳慎子
曰獻之地所以為身也愛地不送死父不義臣故
曰獻之便太子入敬獻地五百里太子歸即位為
王齊使車五十乘來取東地於楚楚王告慎子曰
齊使來求東地為之柰何慎子曰王明日朝羣臣
皆令獻其計上柱國子良入見王曰寡人之得求
反主墳墓復羣臣歸社稷也以東地五百里許齊
齊令使來求地為之柰何子良曰王不可不與也

王身出玉聲許強萬乘之齊而不與則不信後不
可以約結諸侯請與而復攻之與之信攻之武臣
故曰與之子良出昭常入見王曰齊使來求東地
五百里為之柰何昭常曰不可與也萬乘者以地
大為萬乘令去東地五百里是去戰國之半也有
萬乘之號而無千乘之用也不可臣固曰勿與常
請守之昭常出景鯉入見王曰齊使來求東地五
百里為之柰何景鯉曰不可與也雖然楚不能獨
守王身出玉聲許萬乘之強齊也而不與負不義

於天下楚亦不能獨守臣請西索救於秦景鯉出
慎子入王以三大夫計告慎子曰子良見寡人曰
不可不與也與而復攻之常見寡人曰不可與也
常請守之鯉見寡人曰不可與也雖然楚不能獨
守也臣請索救於秦寡人誰用於三子之計慎子
對曰王皆用之王怫然作色曰何謂也慎子曰臣
請効其說而王且見其誠然也王發上柱國子良
車五十乘而北獻地五百里於齊發子良之明日
遣昭常爲大司馬令往守東地遣昭常之明日遣

景鯉車五十乘西索救於秦王曰善乃遣子良北
獻地於齊遣子良之明日立昭常為大司馬使守
東地又遣景鯉西索救於秦子良至齊齊使人以
甲受東地昭常應齊使曰我典主東地且與生死
悉五尺至六十三十餘萬敝甲鈍兵願承下塵齊
王謂子良曰大夫來獻地今常守之何如子良曰
臣身受命敝邑之王是常矯也王攻之齊王大興
兵攻東地伐昭常未涉強秦以五十萬臨齊右壤
曰夫隘楚太子弗出不仁又欲奪之東地五百不

義其縮甲則可不然則願待戰齊王怨焉乃請子
良南道楚西使秦解齊患士年不用東地復全

召門吏為汗先生著客籍五日一見汗明曰君亦
聞驥乎夫驥之齒至矣服鹽車而上大行蹄伸膝
折尾湛肘潰漉汗灑地白汗交流外阪遷延負棘
而不能上伯樂遭之下車攀而哭之解紵衣以羃
之驥於是俛而噴仰而鳴聲達於天若出金石聲
者何也彼見伯樂之知己也今僕之不肖阨於州
部堀穴窮巷沉淪鄙俗之日久矣君獨無意湔祓

僕使得為君高鳴屈於梁乎

燕封宋人榮蚩高陽君使將而攻趙趙王因割濟東三城合盧高唐平原陵地城市邑五十七命以與齊而以求安平君而將之馬服君謂平原君曰國奚無人甚哉君致安平君而將之乃割濟東三城合城市邑五十七以與齊此夫子與敵國戰覆軍殺之所取割地於敵國者也今君以此與齊而求安平君而將之國奚無人甚哉且君奚不將奢也奢常担罪居燕燕以奢為上谷守燕之通谷要

塞奢習知之百日之內天下之兵未聚奢已舉燕
矣然則君奚求安平君而為將乎平原君曰將軍
釋之矣僕已言之僕主矣僕主幸已聽僕也將軍
無言已馬服君曰君過矣君之所以求安平君者
以齊之於燕也茹肝涉血之仇耶其於奢也不然
使安平君愚固不能當榮蚩使安平君智又不肯
與燕人戰此兩言者安平君必處一焉雖然兩者
有一也使安平君智則奚以趙之強為趙強則齊
不復霸矣今得強趙之兵以杜燕將曠日持久數

歲令士大夫餘子之力盡於溝壘車甲羽毛剝敝
府庫倉廩虛兩國交以習之乃引其兵而歸夫盡
兩國之兵無明此者矣是軍也懸釜而炊得三城
城大無能過百雉者果如馬服之言也

魏伐趙趙告急齊齊宣王用孫子計救趙擊魏魏
遂大興師使龐涓將而令太子申為上將軍過外
黃外黃徐子謂太子曰臣有百戰百勝之術太子
曰可得聞乎客曰吾願效之曰太子自將攻齊大
小并營則富不過有魏貫不益為王若戰不勝齊

則萬世無魏矣此臣之百戰百勝之術也太子曰
諾請必從公之言而還矣客曰太子雖欲還不得
矣彼勸太子戰攻欲啜汁者衆太子雖欲還恐不
得矣太子曰欲還其御曰將出而還與北同太子
果與齊戰敗於馬陵

余觀戰國之君未有若楚之愚者張儀說楚王曰
大王誠能閉關絕約於齊臣請獻商於之地六百
里秦楚娶婦嫁女長為兄弟之國楚王大說而許
之陳軫獨吊以為商於不可得而齊秦合則患必

至矣卒不聽未幾而張儀詳失綏隨車商於竟不可得秦要楚欲得黔中地欲以武關外易之楚王曰不願易地願得張儀而獻黔中地卒以鄭袖之言而赦張儀厚禮之如故張儀既出未去聞蘇秦死乃說楚王曰以一詐僞之蘇秦而欲經營天下混一諸侯其不可成亦明矣今秦與楚接境壤界固形親之國也誠能聽臣臣請秦楚太子交質以秦女為大王箕帚之妾効萬室之都以為湯沐之邑長為昆弟之國終身無相攻伐臣以為計無便

此者於是楚王已得張儀而重出黔中地與秦欲
許之屈原曰前大王見欺於儀儀至臣以為大王
身之今縱弗忍殺之又聽其邪說不可懷王曰許
儀而得黔中義利也復而倍之不可故卒許張儀
與秦親後復信秦甘言而身陷於秦聽之不明一
至此哉

筠齋湯錄卷之四

錫山黃學海宗于甫輯

史記

酈生自謂年六十餘長八尺人皆謂之狂生生自謂我非狂生沛公問計將安出酈生曰足下起糾合之衆收散亂之兵不滿萬人欲以徑入強秦此所謂探虎口者也夫陳留天下之衝四通五達之郊也今其城又多積粟臣善其令請得使之令下足下即不聽舉兵攻之臣為內應漢王數困滎陽

城臬計欲捐成臬以東北輦洛以拒楚酈生曰曰
臣聞知天之天者王事可成王者以民人為天而
民人以食為天夫教倉天下轉輸久矣臣聞其下
乃有藏粟甚多楚人拔滎陽不堅守教倉乃引而
東今適卒分守成臬此乃天所以資漢也願急復
進兵收取滎陽據敖倉之粟塞成臬之險杜太行
之道距蜚狐之口守白馬之津以示諸侯形制之
勢則天下知所歸矣觀此策與淮陰登壇對高帝
之言大略皆攻取至計則高帝所任豈特三傑酈

生亦其亞矣

太史公曰高祖起微細定海內謀計用兵可謂盡之矣然而劉敬脫輓輅一說建萬世之安智豈可專耶至其使匈奴還報策其必欲見短伏奇兵以爭利以匈奴不可擊果園帝白登七日然後得解及徙豪右名家居關中備胡六強本弱末之術也酈孫通希世度務制禮進退與時變化卒為漢家儒宗大直若誣道固委蛇蓋謂是乎初酈孫通降漢從儒生弟子百餘人然通無所言進專言諸故

群盜壯士進之弟子皆竊罵不能進臣等專言大
猾何也通曰漢王方蒙矢石爭天下故先言斬將
搃旗之士諸生且待我我不忘矣及爭廢立曰太
子天下本柰何以天下為戲真知當世之要務哉
景帝曰吳王鑄錢煮海誘豪傑白頭舉事其計不
百全豈發乎袁盎曰吳有銅鹽利則有之安得豪
傑而誘之誠得豪傑也且輔王為義不反矣吳所
誘皆無賴子弟亡命鑄錢奸人不足憂也今破矣
條侯乘六乘傳會兵滎陽至洛陽見劇孟喜曰吾

乘傳至此不自意全又以為諸侯已得劇孟孟今
無動吾據滎陽以東無足憂者至淮陽問父絳侯
故客鄧都尉曰榮安出客曰吳兵銳甚難與爭鋒
楚兵輕不能久方今為將軍計莫若引兵東北壁
昌邑以梁委吳吳必盡銳攻之將軍深溝高壘使
輕兵入淮泗口塞吳饒道彼吳梁相敝而糧食竭
乃以全強制其罷極破吳必矣條侯悉從其策吳
臣田祿伯曰兵屯聚而西無他奇道難以就功願
得五萬人別循江淮而上收淮南長沙入武關此

亦一奇也吳王不許吳少將桓將軍說王曰吳多步兵步兵利險漢多車騎車騎利平地顧所過城邑不下直棄去疾西據洛陽武庫食敖倉粟阻山河之險雖毋入關天下固已定矣吳不用其計吳諸賓客皆得為將校獨周丘不得用上謁曰臣以無能不得待罪行間願得一漢節必有以報周丘得節夜馳入下邳下邳皆下一夜得三萬人北畧城邑比至城陽兵十餘萬聞吳敗即引兵歸亞夫能用鄧尉之策則成吳不用田穰伯桓將軍之策

則敗安危在所任信哉

武安侯已罷朝出止車門召韓御史大夫載怒曰
與長孺共一老秃翁何爲首鼠兩端韓御史良久
謂丞相曰君何不自喜夫魏其毀君君當免冠解
印綬歸曰臣以肺腑幸得待罪固非其任魏其言
皆是如此上必多君有讓不廢君魏其必自愧今
人毀君君亦毀之譬如賈豎女子爭言何其無大
體也武安謝罪曰爭時急不知出此梁王出入游
戲僭於天子天子聞之心弗善也太后知帝弗善

乃怒梁使者弗見案責王所為安國為梁使見太
長公主而泣曰七國反時自關以東皆合後西向
唯梁最親為艱難梁王念太后帝在中而諸侯擾
亂一言泣數行下跪送臣等六人將兵擊卻吳楚
梁王之力也今太后以小節苛禮責望梁王梁王
父兄皆帝王所見者大故出稱蹕入言豈車旗皆
帝所賜也驅馳國中以諄諄令天下盡知太后
帝愛之也今梁使來輒案責之梁王恐日夜涕泣
思慕不知所為何梁王之為子孝為臣忠而太后

弗恤也太長公主具以告太后喜曰為言之帝帝
心乃解其後安國坐法抵罪獄吏田甲辱安國居
無何安國為梁內史起徒中為二千石甲肉袒謝
安國笑曰可溺矣卒善遇之漢使十輩至梁捕詭
勝大索月餘不得安國入見王而泣曰主辱臣死
大王無良臣故事紛紛至此語曰雖有親父安知
其不為厖雖有親兄安知其不為狼今悅一邪臣
浮說犯上禁撓明法天子以太后故不忍致法於
王有如太后宮車宴駕大王尚誰攀乎語未卒孝

王泣數行下謝安國曰吾今出詭勝後安國坐法失官以五百金物遺蚡蚡言安國太后天子亦素聞其賢即召以為北地都尉匈奴請和親王恢議興兵擊之安國以為擊之不便不如和親安國為人多大略知足以當世取舍而出於忠孝焉貪嗜於財然所推舉皆廉士賢於已者也惟天子以為國器為御史大夫四歲餘丞相田蚡死安國行丞相事奉引隨車塞天子欲相安國使使視之塞甚乃更以薛澤為相安國病免數月塞愈安國既疏

遠默默也將也又為匈奴所欺失亡多甚自愧歎
血死天子欲相一人而不可得豈非命耶

郎中令李廣為前將軍擊胡大將軍青受武帝陰
誡以廣年老數奇恐不得所欲公孫敖嘗活青欲
俠之以教代廣徙廣為右將軍廣自請欲當匈奴
青使如軍書至所部廣怏怏不別而行竟以迷失
道簿責廣令對簿廣自剄大將軍為人仁善退讓
以和柔自媚於上將兵度幕令武剛車自環為營
而縱五千騎左右翼繞單于時已暮漢匈奴相鈐

擊殺傷大當遂至寶顏山趙信城澤匈奴積粟食
軍悉燒其城餘粟以歸驃騎將軍去病所斬捕功
已多大將軍自是大將軍青日退而驃騎日益貴
然少而侍中貴不省士重車餘棄梁肉而士有飢
者其在塞外卒乏糧或不能自振而尚穿城蹋鞠
事多此類可見自古大將能成功者多幸而會蘇
達嘗責大將軍招選賢者大將軍謝曰自魏其武
安之厚賓客天子常切齒彼親附士大夫招賢絀
不肖者人主之柄也人臣奉法遵職而已何與招

士驃騎亦放此意

唐世說新語

睿宗謂侍臣曰有術士言五日內有急兵入宮卿等為朕脩之張說進曰此有說人設計搖動東宮耳若使太子監國則君臣分定自然覬覦路絕姚崇宋璟郭元振曰如說所言睿宗大悅即日詔皇太子監國時太平公主將有奪宗之計眾皆恐懼宋璟昌言曰太子有大功於天下真社稷主遂與姚崇奏公主就東都出寧王以下為刺史以息人

心睿宗曰朕更無兄弟惟有太平一妹朝夕欲得
相見公主聞之大怒玄宗懼乃奏崇崇離間骨肉
請加罪黜姚崇既出為申州刺史玄宗惡德之素
與張說不叶說諷趙彥昭彈之玄宗不納俄獵於
渭濱召崇會於行所軍國之務咸訪於崇崇裁冗
職脩舊章內外有叙又請無赦宥無度僧無數遷
刺史無任功臣以政玄宗悉從之

蘇頲給事中并脩弘文館學士轉中書舍人時父
瓌為宰相父子同掌樞密時人榮之屬機事填委

制誥皆出其手中書令李嶠歎曰令人思如泉湧
嶠所不及也後與宋璟同知政事璟多所裁銓選
皆順從其美璟甚悅之

玄宗將封禪泰山張說自定升山之官多引兩省
主錄及已之親戚中書舍人張九齡言於說曰官
爵者天下之公器德望為先勞舊為次余登封需
澤千載一遇清流高品不沐殊恩胥吏末班先加
章紱但恐制出之後四方失望今進草之際事猶
可改說曰事已決矣果為宇文融所劾

李勣征高麗將引其子壻杜懷恭行以求勳效懷恭性滑稽初辭以貧勣贍給之又辭以無奴馬又給之既而辭窮乃亡匿岐陽山中謂人曰乃公將我作法則耳固不行勣聞法然流涕曰杜郎放而不拘或有此事遂不之逼

高宗御武成殿召諸舉人親問曰兵書所云天陣地陣人陣各何謂也貢半千越次對曰臣觀載籍多矣或謂天陣星宿祿歷也地陣山川相背也人陣編伍彌縫也以臣愚見則不然夫師出以義有

若時兩則天利此天陣也兵在足食且耕且戰得
地之利此地陣也卒乘輕利將帥和睦此人之陣
也若用兵者使三者去其何以戰高宗深嗟賞對
策第一

隋文帝令楊素造仁智宮引封德彝為土功監宮
成帝大怒曰楊素以百姓之力雕飾離宮為吾結
怨於天下素惶恐慮得罪德彝曰公勿憂待皇后
至必有恩賞明日累召素良久方入對獨孤皇后
勞之曰大用意知吾夫妻年老無以娛心盛飾此

宮室豈非孝順賞賚甚厚素退問德彛曰卿何以知之對曰至尊性儉雖初見而怒然雅聽后言婦人惟麗是好后心既悅聖慮必移所以知耳素嘆曰揣摩之才非吾所及也

太宗有事遼海詔馬周輔皇太子留定州監國及凱旋遣所留貴嬪承恩寵者迂於行在太宗喜悅問高宗高宗曰馬周教臣太宗笑曰山東輒窺我錫賚甚厚

則天問狄仁傑求賢對曰臣前言荊州長史張柬

之猶未用也臣薦之請為相也今為洛州司馬非
用之也乃遷秋官侍郎及姚崇將赴靈武則天令
舉外司堪為宰相者崇曰張柬之沉厚有謀能斷
大事且其人年老急用之登時召見以為鳳閣鸞
臺平章事年已八十矣與桓敬等誅討二張興復
社稷忠冠千古功格皇天云

韓琬少負才華長安中為高郵主簿以州縣徒勞
率然題壁曰筋力盡於高郵容色棄於主簿豈言
行之缺而友朋之過歟景龍中自亳州司戶應制

集於京吏部員外蔣欽緒考琬榮入高等謂琬曰
今日非朋友之過歟昔嘗與魏知古崔瑗盧藏用
聽涅槃經於太雲寺會食之舊舍偶見題壁諸公
曰此高郵主簿嘆後時耶蓄意祈以相汲今日方
申琬謝之曰士感知已豈期十年之外見君子之
深心乎

張嘉貞落魄有大志自卿丞免歸鄉里布衣環堵
之中蕭然自得時人莫之知也張循憲以御史出
還次蒲州驛方湊命使務有不決者意頗病之問

驛吏曰此有好客乎吏白以嘉貞召與相見咨以
其事積時凝滯者嘉貞隨機應之莫不豁然及命
草表又出其意外他日則天以問循憲具以實對
曰請以已官讓之則天曰朕豈可無一官進賢
耶乃召見內殿隔簾與語嘉貞儀貌甚偉神彩雋
傑奏曰臣生於草莽目不覩闕庭之事陛下過聽
引臣天廷此萬代之一遇然咫尺之間若披雲霧
怨君臣之道有所未盡則天曰善遽命捲簾翼日
拜監察御史開元初拜中書舍人遷并州長史節

度使有告其反者鞠之無狀玄宗將罪告事者嘉
貞諫曰准法告事不實雖有反坐此則不然天下
無虞重兵利器皆委邊將若告事一不當隨而罪
之臣恐握兵者生心為他日之患且臣脩腹心不
宜為臣以絕言事之路玄宗大悅許以衡軸處之
嘉貞曰曰吾聞時難得而易失及其過也雖聖賢
不能為時昔太宗用馬周盡其才纔五十而終向
用稍晚則無及已今臣年少壯陛下不以臣不肖
雅宜及時用之他日衰老何能為也玄宗曰卿第

往太原行當召卿年用之為相

蘇味道以文章著述稱遷鳳閣侍郎知政事與張
錫俱坐法繫於司刑寺所司以二相之貴所坐事
輕供待甚備味道終不敢當不乘馬步至繫所席
地而坐蔬食而已錫乘馬至寺舍三品院氣色自
若惟屏飲膳無忝平居則天聞之原味道而放錫
於嶺南

張果老隱於恒州枝條山往來汾晉時人傳其長
年秘術耆老咸云有兒童時見之自言數百歲則

天召之佯死於妬女廟前後有人復於恒山中見
至開元二十三年刺史韋濟以聞詔通事舍人裴
晤馳驛迎之果對晤氣絕如死晤焚香啟請宣天
子求道之意須臾漸蘇晤不敢逼馳還奏之乃令
中書舍人徐嶠通事舍人盧重玄賁璽書迎之果
隨嶠至東都於集賢院有輿入宮脩加禮敬公卿
皆往拜謁或問以方外之事皆跪對每云堯時丙
子年生善於胎息累日不食時進美酒及三黃丸
賜號通玄先生累陳老病請歸恒州賜絹給驛舁

至恒州弟子一人放回一人相隨入山無何壽終
或傳屍解

張九齡善嚴挺之欲引為相謂之曰李尚書方承
恩足下宜一造門與之款懃挺之素薄林甫竟不
詣

則天悔於枉濫謂侍臣曰近者朝臣多被推勘通
相牽引或自承伏國家有法朕豈能違中間疑有
濫者更使近臣就獄推問得報皆自承引朕不以
為疑即可其奏豈不有冤姚崇對曰自垂拱以後

被告者皆枉酷自誣告事者特以為功陛下令近
臣就獄問者近臣亦不自保何敢輒有動搖賴上
天降靈聖情教悟誅滅凶豎朝廷宴安今日已後
微軀及一門百口保見在內外官更無反逆者則
天大悅曰已前宰相皆順成其事陷朕為淫刑之
主聞卿所說甚愜朕心乃賜銀一千兩

李輔國扈從肅宗柩止帷幄宣傳詔命自靈武即
判行軍司馬中外樞要一以委之及克京城後於
銀臺門決事凡追捕先行後聞權傾朝野道路側

目及求宰相肅宗謂之曰卿勲業則可公卿大臣不欲如之何又諷裴冕等速表薦已肅宗深患之乃謂蕭華曰輔國求為宰相若公卿表來不得不與裴冕潛為之所華出問冕冕曰初無此事臂可截也而表不為也復命奏之上大悅

郭元振為涼州都督先是涼州南北不過四百餘里吐蕃突厥二寇頻至城下百姓苦之元振於南界硤石至和戎城北界磧中置白傳軍控其路要遂拓州境一千五百里自是虜不復蹤又令甘州

刺史李漢通置屯田盡水陸之利徃年粟麥斛至數千及元振為都督一鰵易數十斛軍糧積十年牛羊被野路不拾遺為涼州五年夷夏畏慕

房玄齡與杜如晦友善慨然有匡主濟時之志開皇中隨父彥謙至長安時天下寧晏論者以為國祚無疆玄齡密告彥謙曰隋帝監有天下不為後嗣長計混淆嫡庶使相傾奪今雖清平其亡可翹足而待彥謙驚止之曰謂友人李少通曰主上性多忌刻不納諫爭太子卑弱諸王擅威唯行苛酷

之政不私遠大之略今雖少安吾憂其危亂矣少
通以為不然大業之季其言皆驗及義師濟河玄
齡杖策謁于軍門太宗以為謀主每歎曰昔光武
云自吾得鄧禹門人益親寡人有玄齡亦猶禹也
佐平天下及終相位凡三十二年號為賢相然無
跡可尋為唐宗臣宜哉

蓬底浮談

羅整菴謂胡敬齋大類尹和靖皆是一敬字做成
居業錄中言敬最詳近日之學太高太玄使人漫

無用功處不如專學敬齋動靜語默造次不違則
放心自收耳故 本朝理學薛文清胡敬齋最為
可學學孔孟者學程朱學程朱者先學薛胡二子
亦庶乎其不差矣

古者詩言志後世不過詠詞耳位廊廟而詠山林
居奢靡而說恬澹猶之可也李林甫贈韓席詩乃
曰揆予秉孤直虛薄忝文昌豈不自知其奸險耶
猶有甚焉者曹孟德詩云周公吐哺天下歸心是
以周公自方矣豈非至無忌憚者乎

三十輻共一轂當其無有車之用埴埴以為器當其無有器之用鑿戶牖以為室當其無有室之用故有之以為利無之以為用夫轂也器也戶牖也非無物也惟虛其中而後有車有器有室之用耳虛能生氣之說窺造化太初之妙程子又言虛者天地之祖天地後虛中來不知何以不取老氏之說也

老子之可取者佳兵不祥之說知止知足之說至深根固蒂長生久視之道屢言而不足尤其所長

者也

莊子逍遙遊大都言鵬搏九萬里以六月息而蜩鳩斥鴳笑之大椿以八千歲為春秋而朝菌蟪蛄不知故夫知效一官德合一君者其自視亦猶斥鴳朝菌耳若列子之御風庶幾矣而猶有所待也惟乘天地之正而御六氣之辯以遊無窮者方無所待是至人無已神人無功也故許由無所用天下為而藐姑射之神人苟得此道遇大壑則慮為大樽而浮於江湖遇大樹則樹之於無何有之鄉

廣莫之野彷徨乎無為其側逍遙乎寢卧其下矣
蓋至人之超乎物而遊於無極者也故命之曰逍
遙遊即遠遊之謂也與君子之素位而行豈可同
日語哉楊龜山云子思所謂無入而不自得非也
王斗曰吾晚食以當肉安步以當車清靜無為以
當貴其言偉矣然猶有心於自遣也北宮子衣其
短褐有狐貉之溫進其菽菽有稻粱之味庇其蓬
室若廣廈之蔭乘其輶輅若父軒之飭終身陶然
不知其為貧則心安不待遣而自得矣非庶幾簞

瓢陋巷不改其樂者乎

陳太丘恬淡寡欲何進袁忱表以不次之位時三公每缺議者推之皆辭謝不起其送張讓父之葬特少貶以避綢耳易所謂見惡人無咎而黃勉齋譏之以為枉尺直尋而可為夫枉尺直尋謂枉道以求仕也若不得已而少屈以自全固君子之愛身以存道耳遇陽貨而不避夫子為之矣史稱漢誅黨人讓感寔故多所全宥勉齋謂東漢善類盡為宦官所殺亦不可藉太丘之屈辱以全身光為

抑揚太過程子曰當際之時小人乖異者衆若
絕之不幾盡天下以讐君子乎如此則失含弘之
義是君子之中道足以起太丘矣

管幼安如鳳凰翔千仞如景星慶雲見於雲霄
使人可望而不可及其猶在郭林宗徐孺子之右
乎

謝安何可輕也初桓溫之舉安將以自翼也安則
終不附溫而器度聞望復足以寢其覬覦之念庶
幾乎汲黯之於淮南也是豈虛名之可為乎舉玄

以禦秦議者遂知去之不負所舉則其膠秦者非
偶然也燭其婚王鑒之奸終身抑之俾不得入相
故盛有遲我十年作相之語其忠智大節炳炳若
是世人不察謂之虛名殆矮人觀場者歟

王莽以安車迎薛方方曰使者辭謝曰光祿在上
下有巢由今明主方隆唐虞之德小臣欲守箕山
之節陳咸以律令為尚書見何武鮑宣死歎曰易
說見幾而作不俟終日吾可以逝矣即乞骸骨去
職莽篡位召咸為掌寇大夫謝病不應三年參豐

欽皆在位悉令解官歸故里閉門不出入猶用漢家祖臘人問其故咸曰我先人豈知王氏臘乎二子危行言絲不激不隨可謂處亂世之法

續通鑑

建中靖國元年正月朔有赤氣亘天是夕赤氣起東北亘西南中函白氣將散復有黑綬在傍右正言任伯雨言正歲之始而赤氣起於暮夜之幽日為陽夜為陰東南為陽西北為陰中國為陽夷狄為陰此下干上夷狄竊殺之證也

佞使小人無得生犯上之心則災異可變為休祥
矣及童貫黃經臣用事與中丞盧航表裏為奸縉
紳側目右正言陳禾劾貫等怙寵弄權願亟竄之
遠方帝拂衣起禾引衣請畢其說衣裾落帝曰正
言碎朕衣矣禾言不惜碎衣豈惜碎首以報陛下
此曹今日受富貴之利陛下他日受危亡之禍言
愈切內侍請易衣帝曰留以旌直臣貫等相率訴
謂國家極治安得如此不祥語盧航奏禾狂妄謫
監信州酒二人先見不棄毫髮不惟言不見用而

且悲被斥逐可勝歎哉

曾布初附章惇凡惇所為多布所建白及不得同
省始與乖異布既拜相其弟肇言於布曰兄方得
君當引用善人翊正道以杜惇卞復起之萌而數
月以來端人正士繼迹去朝所進皆前日事惇卞
者一旦勢異今日必首引之以為固位計思之可
為慟哭異時惇卞縱未至一蔡京足以兼二人可
不深慮乎其後卒相京以兆宋室之禍肇言真龜
鑑哉

宋初東南六路糧斛自江浙起綱至於淮甸以及
真揚楚泗為倉屯以聚軍儲復自楚泗搬運上京
故常有六百萬石以供京師而諸倉常有數年之
積州郡知歉則折收上價謂之額斛計本州歲額
以倉儲代輸京師謂之代發復於豐熟以中價收
糴穀賤則官糴不至傷農飢歉則令民納錢民以
為便本錢歲增兵食有餘其法良善及蔡京當國
始求羨財以供侈費以其姒家胡師文為發運使
以糴本數百萬緡充貢入為戶部侍郎自是繼者

效尤時有進獻而本錢竭矣王祖道欲取南丹道
以為功乃誣其首莫公佞以罪發兵討擒之以南
丹州為觀州其弟公晟結溪峒報復侵掠城邑殺
刺史蔡京匿不以聞京以功加太尉而召祖道為
兵部尚書祖道在桂四年厚以官爵金帛挑諸夷
建城邑調兵鎮戍地瘡痍戍者十亡五六實無尺
土一民益於縣官祖道性既鑿空超取顯羨效者
相繼邊壤益多故矣吁金穀兵戎國之重務而措
置如是宋之為宋可知已

宣和中謀者云遺主有亡國之相王黼薦画正陳
堯臣使遺堯臣繪遺主像以歸言於帝曰以相言
之虜主已在旦夕幸速進兵并圖其山川險易以
上帝大喜取燕雲之計遂決然後知虜主之將亡
國而不自鑑何哉

孝宗謂葉衡等曰朝廷用人止論其賢否如何不
可有黨如唐之牛李相攻皆緣主聽不明文宗乃
言去河北賊易去朝中朋黨難朕常咲之人主但
公是公非何緣有黨然葉衡陳俊卿虞允文皆賢

者卒不能勝史浩曾覲等之說擠何暇笑唐之不
明哉

陳俊卿過關入對極言曾覲王抃甘昇三人招權
納賄薦進人才而以中批行之等事且曰去國十
年見都城穀賤人安惟士大夫風俗大變向奔覲
抃之門十纔一二尚畏人知今則公然趨附已七
八不復顧忌矣然俊卿猶淺言之耳當時謝廓然
黨曾覲除侍御史以李顯忠之忠義為邵宏淵所
忌致苻離之潰廷議黜顯忠而宏淵職任如故至

有鉅儒名士亦因史浩之薦而得大用可勝歎哉
余客歲往返婁江道上舟行寂寞偶携宋史披
閱次見其謀議舛戾措置乖方間有忠猷讜論
輒棄不省令人憤懣髮欲指冠錄其可為永戒
者以示龜鑑焉 右宋鑑數事皆可慨可愕讀
之不覺廢書長太息每事輒贅膚語于末聊寄
感愴若史漢歷朝事偶有管窺亦間附數語云
萬曆辛丑歲孟夏梁溪黃學海識

鈞齋漫錄卷之四終